

歲時廣記
三



歲時廣記 三



歲時廣記

(三)

陳元靚編

叢書集成初編

(補印本)

歲

時

廣

記

三

冊

一九三九年十二月初版

陳元靚編

商務印書館出版

上海市印刷四廠印刷

歲時廣記卷二十七

七夕中

乘浮槎

張茂先博物志舊說天河與海通近世有人居海上者每年八月見浮槎來不失期心竊異之候其復來乃賚一年糧乘之十餘日猶見日月星風自後茫然亦不覺晝夜忽至一處有城郭屋舍甚盛遙望宮中有婦人織見一丈夫牽牛渚次飲之驚問曰何由至此其人說與來意并問此是何處答曰君至蜀郡訪嚴君平則知矣不及登岸復乘槎還家徑入蜀問君平君平曰某年月日有客星犯牛宿計其年月日正是此人到天河也宗懷作荆楚歲時記乃引博物志直謂張騫乘槎宗懷不知何據趙璘因話錄亦嘗辨此事杜甫詩云乘槎斷消息無處問張騫又查上似張騫似亦誤也東坡七夕詞云乘槎歸去成都何在萬里江濤蕩漾與君各賦一篇詩留織女駕鵞機上又詩云豈如乘槎天女側獨倚雲機看織紗山谷詞云待乘槎仙去若逢海上白頭翁其一訪癡牛駮女

得機石

荆楚歲時記漢武帝令張騫使大夏尋河源乘槎經月而去至一處見城郭如官府室內有一女織又見一丈夫牽牛飲河騫問曰此是何處答曰可問嚴君平織女取搗機石與騫而還後至蜀問君平君平曰

某年月日。客星犯牛女。所得搗機石。爲東朔所識。按騫本傳及大宛傳。騫以郎應募。使月氏。爲匈奴所留。十餘歲得還。騫身所至者。大宛。大月氏。大夏。康居。而傳聞其旁大國五六。具爲天子言其地形所有。並無乘槎至天河之謂。而宗懷乃傳會以爲武帝張騫之事。又益以搗機石之說。藝苑雌黃云。今成都嚴真觀有一石。呼爲支機石。相傳云。漢君平留之。予寶歷中。下第還家。於京師道次。逢官差遞夫。舁張騫槎。先在東都禁中。今準詔索有司取進。不知真何物也。宋之問明河篇云。明河可望不可親。安得乘查一問津。更將織女支機石。還訪成都賣卜人。查與槎同。支與搗同。劉禹錫七夕詩云。機罷猶安石。橋成不礙查。杜子美詩云。聞道尋源使。從天北路回。牽牛去幾許。宛馬至今來。又陳無己七夕詩云。早晚望夫能化石。盡分人世作支機。

賜壽考

神仙感遇傳。郭子儀。華州人也。初從軍沙塞間。因入京催軍食。回至銀州數十里。日暮。忽風沙斗暗。行李不得隨。入道旁空屋中。藉地將宿。既夜。忽見左右皆有赤光。仰視空中。忽見輜車綉幄。中有美人坐床垂足。自天而下。俯視子儀。子儀拜祝云。今七月七日。必是織女降臨。願賜長壽富貴。女笑曰。大富貴亦壽考。言訖冉冉昇天。猶視子儀。良久而隱。子儀後立功貴盛。威望烜赫。大歷初。鎮河中。疾甚。三軍憂懼。公謂御醫及幕賓王延昌。孫宿。趙惠伯。嚴郢曰。吾此疾自知未便衰殞。因話所遇之事。衆皆稱賀忻悅。其後拜太尉。尚書令。尚父。年至九十而薨。

乞富貴

風土記。七月七日。其夜灑掃庭除。露施几筵。設酒脯時果。散香粉於筵上。祈請何鼓。織女言此二星當會。守夜者咸懷私願。或云。見天漢中有奕奕白氣。或光耀五色。以此爲徵應。見者便拜而陳願。乞富乞壽。無子乞子。唯得乞一。不得兼求。三年後方得言之。頗有受祚者。歐陽永叔詩云。奕奕天河光不斷。有人正在長生殿。蔡持正七夕詩云。焚香再拜穿華線。候得神光白氣飛。

祈恩霽

天寶遺事。明皇與妃子。每七夕往華清宮遊宴。時宮女陳瓜果酒饌。列於庭中。祈恩牛女。又各捕蜘蛛。閉小盒中。至曉開視。以驗得巧之多少。民間爭效之。杜子美詩云。蛛絲小人態。結綴瓜果中。

去蹇拙

柳柳州文集乞巧文云。柳子夜歸自外。庭有設祠者。饗餌馨香。蔬果交羅。且拜且祈。恠而問焉。女隸進曰。今茲秋孟七夕。天女之孫。將嬪於何鼓。邀而祠者。幸而與之巧。驅去蹇拙。手目開利。組紉縫製。無滯於心焉。柳子曰。吾亦有大拙。儻可因是以求去之。乃再拜而進曰。臣有大拙。智所不化。鑿所不攻。威不能遷。寬不能容。云云。

丐聰明

歲時雜記。七夕。京師諸小兒。各置筆硯紙墨于牽牛位前。書曰。某乞聰明。諸女子致針綫箱笥於織女位。

前書曰某乞巧。

益巧思

吳淑祕閣閒談。蔡州丁氏精於女工。每七夕。禱以酒果。忽見流星墜庭中。明日於瓜上得金梭一枚。自是巧思益進。

留寶枕

墨莊宥錄。太原郭翰。少有清標。姿度秀美。善談論。尙草隸。當暑。乘月臥庭中。時有微風。稍聞香氣。翰甚恠之。仰視空中。有人冉冉而下。直至翰前。乃一少女也。明豔絕代。光彩溢目。衣玄綃之衣。曳霜羅之帔。戴翠翹鳳凰之冠。躡復文九章之履。侍女二人。皆有殊色。翰整衣巾拜謁曰。不意真靈迺降。願垂德音。女微笑曰。吾天之織女。久無主對。而佳期阻曠。幽態盈懷。上帝賜命。許遊人間。仰慕清風。願託神契。翰曰。非敢望也。乃所願也。女敕侍婢淨掃室中。張霜霧丹縠之幃。施水晶玉華之簾。轉回風之扇。宛若清秋。乃攜手升堂。解衣共寢。並同心龍腦之枕。覆雙縷鴛文之衾。膩體柔肌。深情密態。妍豔無匹。欲曉辭去。自後夜夜往來。情好轉切。翰戲之曰。牽郎何在。那敢獨行。對曰。陰陽變化。關渠何事。且河漢隔絕。無可復知。縱使知之。不足爲慮。因相與談論星辰躔度。列宿分位。翰遂洞曉之。後將至七夕。忽爾不來。數夜方至。翰問曰。牽郎相見樂乎。笑而對曰。天上那比人間。正以期運當爾。非有他故。况一年一度相會。爭如今日夜夜相逢。君毋猜忌。又問曰。卿來何遲。曰。人中五日。彼一夕也。經一年。忽一夜。悽惻流涕。執翰手曰。帝命有程。便當永

訣以七寶枕留贈曰。明年此日當奉書音。翰報以玉環一雙。騰空而去。及期遣侍女奉書函至。言詞清麗。情意重疊。末有詩二首。其一云。河漢雖云闊。三秋尙有期。情人知有意。良會在何時。又曰。朱閣臨清漢。瓊宮締紫房。佳期情在此。只是斷人腸。翰亦謝以詩曰。人世將天上。由來不可期。誰知一回顧。交作兩相思。又曰。贈枕猶香澤。啼衣尙淚痕。玉顏霄漢裏。空有往來魂。是歲太史奏織女星失度無光。翰官至御史。

授釵鈿

陳鴻長恨傳。唐玄宗在位。以聲色自娛。宮中萬數。無悅目者。駕幸華清宮。上心油然。恍若有遇。詔高力士潛搜外宮。得宏農楊元琰女子。於壽邸。旣笄矣。鬢髮膩理。織穠中度。舉止閒冶。別疏湯泉。詔賜澡瑩。旣出水。體弱力微。若不任羅綺。光彩煥發。轉照動人。上不勝悅。進見之日。奏霓裳羽衣以勸之。定情之夕。授金釵鈿合以固之。明年册爲貴妃。半后服用。冶容敏詞。婉變萬態。與上行同輦。止同宮。宴專席。寢專房。雖有三夫人。九嬪。二十七世婦。八十一御妻。暨後宮才人。樂府妓女。使天子無顧盼者。民謠云。生女勿悲酸。生男勿喜歡。又云。男不封侯女作妃。君看女卻爲門楣。人心羨慕如此。天寶末。安祿山引兵向闕。以討楊妃爲辭。玄宗幸蜀。道次馬嵬。六軍徘徊不進。當時敢言者。請以貴妃塞天下之怒。上知不免。反袂掩面。使牽貴妃而去。就絕於尺組之下。肅宗受禪。大駕還都。尊玄宗爲太上皇。每春花秋月。天顏不怡。適有方士楊。外傳云。方士卽楊通幽也。自蜀而來。知上皇心念楊妃。自言有李少君術。上皇大喜。命致其神。方士竭術索之。不至。又遊神馭氣。旁求四虛。極天涯。跨蓬壺。有洞戶。東向。署曰玉妃太真院。方士抽簪扣扉。有雙鬢應門。復入。俄

有碧衣侍女繼至。詰所從來。方士稱唐天子使者。且致其命。碧衣云。玉妃方寢。請少待之。頃間。碧衣延入。且曰。玉妃出見。一人冠金蓮。披紫絹。佩紅玉。曳鳳舄。左右侍者七八人。揖方士。問皇帝安否。次問天寶十四年已還事。言訖憫然。指侍女取金釵鈿合。各折其半。授使者曰。爲謝上皇。謹獻是物。尋舊好也。方士受辭與信。將行。色有不足。玉妃因徵其意。復前跪致辭。乞當時一事不聞於它人者。驗於上皇。不然。恐鈿合金釵。負新垣平之詐也。玉妃茫然退立。若有所思。徐而言曰。昔天寶十載。侍輦避暑驪山宮。秋七月。牽牛織女相見之夕。秦人風俗。夜張錦綉。陳飲食。樹花燔香於庭。號爲乞巧。宮掖間尤尙之。時夜始半。休侍衛於東西廂。獨侍上。上憑肩而立。因仰天感牛女事。密相誓心。願世世爲夫婦。言畢。執手各嗚咽。此獨君王知之耳。因自悲曰。由此一念。又不復居此。當墮下界。且結後緣。或天或人。決再相見。好合如舊。使者還奏。皇心嗟悼久之。餘見唐史。白居易作長恨歌云。臨別殷勤重寄詞。詞中有誓兩心知。七月七日長生殿。夜半無人私語時。後人又作伊州曲云。金雞障下胡雛戲。樂極禍來。漁陽兵起。鸞輿幸蜀。玉環縊死。馬嵬坡下塵萍。夜對行宮皓月。恨最恨春風桃李。洪都方士。念君縈繫妃子。蓬萊殿裏覓尋。太真宮中睡起。遙謝君意。淚流瓊臉。梨花帶雨。髻拂霓裳。初試寄鈿合。共金釵。私言徒爾。在天願爲比翼同飛。居地應爲連理。雙枝。天長與地久。唯此恨無已。

化土金

夷堅乙志。起居注。南安軍南康縣民陽大明。葬父於黃公坑山下。結廬墓側。所養白雞爲狸捕去。藏之石

穴次夕雷震石粉碎。狸死焉。人以爲孝感。值七夕。有道人至廬所。見之。歎其純孝。指架上道服曰。以是我當有以奉報。大明與之無靳色。道人解腰間小瓢。貯衣其中。瓢口甚窄。而衣入無礙。俄取案間小黑石拊摩之。噓呵卽成紫金。又變藥末爲圓劑。以授大明。大明謝曰。身居貧約。且在父喪。不敢覬富壽也。道人益奇之。探瓢取道服還之曰。聊試君耳。題詩椽間曰。陽君真確士。孝行動穹壤。皇上憐其艱。七夕遣回往。遂巡藥頑石。遣子爲饋享。子旣不我愛。吾亦不汝強。風埃難少留。願子志勿爽。會當首鼠記。青雲看反掌。遂別去。鄉人聞者。競觀之。題處去地幾丈許。始以淡墨書。旣而墨色粲發。字體飛動。皆疑其神仙云。時紹興十三年也。里胥以事聞於縣。縣令李能一白郡守。上諸朝。明年。詔賜帛十疋。令長吏以歲時存問之。

運水銀

提要錄。元豐六年。呂吉甫守單州。聞天慶觀七月七日有異人過焉。索筆書二詩。其一云。野人本是天台客。石橋南畔有住宅。父子生來只兩口。多好歌坐不好拍。其二云。四海孤遊一野人。兩壺霜雪足精神。坎離二物全收得。龍虎丹行運水銀。時呂守之壻余中在傍。釋之曰。天台客。賓也。石橋洞也。兩口。呂字也。歌而不拍。乃吟詩也。吟此詩者。其呂洞賓乎。後篇乃是詩題耳。

殮松柏

孫真人枕中記。採松柏法。嘗以三月四月採新生松葉。可長三四寸。并花葉取。陰乾細搗爲末。其柏葉取深山谷中。採當年新生可長三二寸者。陰乾細搗爲末。用白蜜和丸。如小豆大。常以月一十五日日出。

時燒香東向。手持藥八十一丸。以酒下。服一年。延一十年命。服二年。延二十年命。欲得長肌肉。加大麻巨勝。欲心力壯健者。加茯苓人參。此藥除百病。益元氣。滋五臟六腑。清明耳目。強壯不衰老。延年益壽神驗。用七月七日露水丸之更佳。服時乃咒曰。神仙真藥。體合自然。服藥入腹。天地齊年。咒訖服藥。斷諸雜肉。五辛切忌。慎之。

餌松實

林氏傳信方。七月七日。取松實。過時卽落難收。去木皮。搗如膏。每服如雞子大。日三服。能絕穀。久服昇仙。渴卽飲水。勿食他物。服及百日。身輕。三百日。日行五百里。又法。搗爲膏。酒調下三錢。亦可以煉了。松脂同服之。劉向列仙傳。偃佺者。槐山採藥父也。好食松實。形體生毛。長數寸。屈原九歌。山鬼章云。飲石泉兮殞松柏。

服柏子

千金方。七月七日。採柏子。治服方寸七。日三四。又云。一服三。今久服亦辟穀。令人不老。張華博物志云。荒亂不得食。細切柏葉。水送下。隨人能否。以不飢爲度。此葉苦。不可嚼也。老杜詩云。翠柏苦猶食。晨霞高可餐。

取菖蒲

千金方。七月七日。取菖蒲酒服三方寸七。飲酒不醉。好事者服而驗之。不可犯錢。若犯錢。令人吐逆。治人。

好忘久服聰明益智。

折荷葉

太清諸草木方。七月七日採蓮花七分。八月八日採蓮根八分。九月九日採蓮實九分。陰乾搗篩治服方寸七。令人不老。

和桃花

韋氏月錄。七月七日取烏雞血。和三月三日桃花末塗面及遍身。三二日肌白如玉。此是太平公主法。曾試有驗。

曬槐汁

圖經本草。按爾雅槐有數種。葉大而黑者名櫬槐。晝合夜開者名守宮槐。葉細而青綠者但謂之槐。其功用不言有別。四月五月開花。六月七月結實。治五痔。七月七日採嫩實擣取汁。銅器盛之。日煎令可作丸。大如鼠屎。內竅中。三易乃愈。補絕傷火瘡。婦人乳癭。子藏急痛。千金方。銅器盛。實高門上。曝二十日。已上日。卻煎令成膏。作丸如前法。又云。神方主痔。

煎苦瓠

千金方。七月七日生苦瓠中白絞取汁一合。以醋一升。古文錢七箇浸之。微火煎減半。以沫內背中大治眼暗。

摘瓜蒂

本草瓜蒂苦寒有毒。主大水。身面四肢浮腫。下水殺蠱毒。食諸果病在胸膈腹中。皆吐下之。生嵩高平澤。七月七日採陰乾。陶隱居云。瓜蒂多用早青瓜蒂。此云七月採。便是甜瓜蒂也。

剪瓜葉

淮南子。七月七日午時。剪生瓜葉七枚。直入北堂中。向南立。以拭面。即當滅矣。

拾麻花

外臺祕要。治瘰癧。七月七日。拾麻花。五月五日。收艾葉。二件作炷。於瘰癧上灸百壯。

蒸麻勃

千金方。七月七日。用麻勃一斗。真人參二兩。末之。蒸令氣遍。夜欲臥。酒服一刀圭。盡知四方之事。本草云。麻蕒一名麻勃。此麻花上勃勃者。七月七日採良。

種天草

圖經本草。景天草生太山谷。今南北皆有之。人家多種於中庭。或以盆植於屋上。云以辟火。故又謂之慎火草。春生苗。似馬齒而大。作層而上。莖脆。夏中開紅紫花。秋後枯死。神農本草云。景天草一名慎火。一名戒火。一名救火。七月七日採陰乾。

乾藍草

千金方解諸藥毒散。七月七日取藍陰乾搗和水服方寸七日三服。中毒者春燕毛二枚和水二升服之。差。

吞小豆

韋氏月錄河圖記。七月七日取赤小豆男吞一七女吞二七令人畢歲無病。

食海藻

本草海藻一名落首一名薄。七月七日探曝乾生深海中及新羅海人取藻正在深海底以繩繫腰沒水下得則旋繫繩上孟詵云海藻起男子陰氣常食消男癩北人不宜食。

收公寄

本草云丁公寄味甘主金瘡痛延年一名丁父生石間蔓延木上細葉大枝赤莖實大如磧黃有汁七月七日採按陳藏器云丁公寄卽丁公藤也。

塗守宮

淮南子畢萬術。七月七日採守宮陰乾爲末井花水和塗女身有文章似丹砂塗之不去者不淫去者有姦。

帶蛛網

千金方。七月七日取蛛網一枚著衣領中勿令人知則永不忘也。又日華子云蛛網七夕朝取食之令人

巧去健忘。

採蜂房

本草。露蜂房有毒。主驚癩。一名蜂腸。一名百穿。一名蜂勅。生山谷。七月七日採陰乾。又圖經云。古今方書治牙齒傷多用之。七月七日採。

捉螢火

本草。螢火無毒。生明目。小兒火瘡。一名夜光。七月七日取陰乾。藥性論云。螢火亦可單用治盲眼。

捕丹戩

本草云。丹戩味辛。主心腹積血。一名飛龍。生蜀郡。如鼠婦。青股赤頭。七月七日捕採。又云。七月七日採黃蟲。療寒熱。生地上。味苦。赤頭長足有角羣居。

燒赤布

淮南子畢萬術。赤布在戶。婦人留連。注云。取婦人月事布。七月七日燒灰置楣上。卽不復去。勿令婦人知之。

歲時廣記卷二十八

七夕下

食仙桃

漢武帝內傳。帝好神仙之道。元封元年正月甲子。登嵩山。起道宮。齋居禱祠。以求神應。至四月戊辰。帝方御宴殿。時東方朔及董仲君在側。忽有一女子來。語帝曰。聞子輕四海之祿。訪道求生。屢禱山川。似可教者。從今日始。清齋不交人事。七月七日。王母當暫至也。言訖。女子忽不見。帝問東方朔何人。朔曰。乃西王母。紫蘭宮女。常傳命往來人間。帝於是登真臺。齋戒存道。至七月七日。灑掃宮掖。燔百和之香。然九光之燈。躬監香果。爲天官之饌。帝乃盛服。至于階下。勅內外謐寂。以候仙官。二更之後。忽見西南如白雲起。鬱鬱趨陛。須臾。王母乘雲輦而降。帝問寒暄畢。王母自設天廚。以仙桃餉帝。復召上元夫人與帝同宴。因授以五岳真形圖及靈光經。夫人亦以六甲靈飛十二事授帝。至明。王母與夫人同乘而去。

請仙藥

漢武帝故事。七月七日。上御承華殿齋正中。忽有青鳥從西來。集殿前。上問東方朔何鳥也。朔曰。此西王母欲降以化陛下。上乃施帷帳。燒貝末香。香迺率國所獻。塗宮門。香聞百里。是夕漏七刻。西方隱隱若雷聲。有頃。王母乘雲車而至。玉女馭母。戴七勝。青氣如雲。上拜請不死之藥。母曰。帝滯情不盡。慾心尙多。